



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

Tir Yimyim

tiryimyim@aolima

tir yimyim

TAPAK 8

Myanmar: Aung San Suu Kyi sorkar meyong ki nung yua lir

Women's World Cup: China asoshi mezüngbuba takok nguogo



FIFA WOMEN'S WORLD CUP



VOL. XX NO. 286 (ADOK 286) DIMAPUR

KÜPTOKNÜ (SATURDAY)

CHITENI (JULY) 29, 2023

₹ 5.00

ENPO-i indang taila draft ka prokshir

Dimapur, July 28, 2023 (TYO): Eastern Nagaland Peoples Organisation (ENPO)-i Ministry of Home Affairs (MHA), GoI nem agütsüba original draft ta ser taila draft ka prokshia nübortemi anisatsü meranger ta ENPO-i Hokolbarnü metetdaksü.

Iba taila draft nung Eastern Nagaland region nungi National Workers ajak temai adoktsü aser Eastern Nagaland tesem nung Indo-Myanmar arrtsütem atsüdagtsü indang shia lir ta osang angazüker saka item ajakji tiyazü lir. Nisung kar ajangzüksü mechi nung iba taila draft ajanga yimjung meimba Naga nunger tsüingda terata aser temulung melemtep adokdaksütsü meranger, ta ENPO-i sangdong ka nung ashi.

ENPO-i GoI nem agütsüba draft nung Eastern Nagaland nungi National Workers ajak temai adoktsüba indang shia mali kechiyong Naga National Movement ya ajak atema mapa tulutiba lir, ta ENPO-i ashi.

ENPO-i agütsüba draft nung December 18, 2007 nü ENPO ajanga bangzüng renemba indang dang zülua lir.

ENPO indang original draft nungsa international border

atsüdagtsü indang kecha shia mali. Naga nungger ajaki asenok ya artificial borders ajanga lemsaba meteta lir aser arrtsü adena orr asen adianutem lir, ta ENPO sangdong nung shia lir.

2016 küm Myanmar arrtsü atsüdagtsü atema mapa inyadkang ENPO-i iba maparen anema Pangsha Helipad nung lungkak aitba sentong ka agi. Maneni, Khiamniungan Tribal Council aser ENPO ketdangpurtemi 2017 küm New Delhi nung oa Prime Minister dang arrtsü matsüdagtsü atema memorandum ka agütsü, ta ENPO-isa metetdaksüogo.

ENPO-i nübortemi aginüba ama Constitution of India nung Arrla 371A kübok ketdangsubaren balaka tenzüksü atema inyaker. Onoki mezüng agütsüba draft nung Arrla 371A (1) (d) yanglushitsü shia liasü saka iba onükji onoki agienogo, ta ENPO-isa metetdaksü.

Naga nungger ajak temoatsü agia iba tenangzüktep nung sign süteptsü atema Naga nungger adianu ajak, Nagaland sorkar aser sendaktepa alir ajaki onok yaritsü mepishir, ta ENPO-isa metetdaksü.

ECI-i Biswajit Das'er kibong nem senotsü teyari agütsü

Zunheboto, July 28, 2023 (DIPR): Nagaland nung taküm February ita assembly elections agidang asüba Biswajit Das'er kibong nem Election Commission of India (ECI)-i senotsü teyari agütsüogo.

Das ya Assam kübok Nagaon district nungi liasü aser Jharkhand police E-19 company nung handyman ka inyaka liasü. Assembly election mapang parnok Zunheboto district kübok Aghunato assembly constituency nung Viyilho yimtsüng nung

mapa lemsüka liasü.

February 28, 2023 nü pa asü. Iba atema ECI-i senotsü teyari bener yok aser ibaji Hokolbar Zunheboto deputy commissioner Rahul Bhanudas Mali, IAS-i Biswajit tebu Pratis Das ket nung agütsü.

Maneni, DC Mali-isa tanü Khuwaboto colony nung alir Kiholi Zhimo nem senotsü teyari agütsü.

Kiholi ya Assam Rifles camp teküpoklen alir aser taoba ita anentsüh agi lar ki raksaja liasü.

Nagaland nung Energy Access Explorer tenzükogo

Kohima, July 28, 2023 (TYO): Hokolbarnü Advisor to Chief Minister aser Investment and Development Authority of Nagaland (IDAN) Chairman Abu Metha-i Nagaland atema Energy Access Explorer (EAE) tenzüksüogo. EAE ya World Research Institute (WRI) India indang sabang ka lir.

Nagaland nung sub-health centers 434 aser 2074 public schools nungi 12% tashi nung electricity mali. Meta talang pilar aliba tesemtem nung social infrastructure ali nung dang state renloktsü ta Abu Metha-i o jembidang ashi.

"Terenlok aser tejakleni aoba nung energy ya kanga dang

tongtipang. EAE ajanga Nagaland renlokba nung tongti shilem agitsü amanger aser Nagaland asoshi inyakyim tasen ka bentsür arutsü. Sorkari WRI India den tesentaktep akangshitsü aser külemi taginübatem tongteta inyaka aotsü" ta pai ashi.

"North East merenlok tashi India merenloktsü ta Prime Minister Narendra Modi-i shiogo. North East aser Nagaland ajanga dang India-i South Asia linüktem den inyaksangshitetsü" ta Abu-isa ashi.

"Asian rongsenketzüng ajanga linük yimsü asüdag North East aser Nagaland renloktsü aser tejakleni aotsü.

(Maneni tapak 8 nung...)

Temesen junga anepalura Hepatitis nungi jenbuttsü

Kohima, July 28, 2023 (TYO): Hokolbarnü Red Cross Conference Hall, Kohima nung "We're not waiting" omen nung ajemdaker World Hepatitis Day 2023 mongogo.

"Sentong, maparen aser mission mapa takok ngua inyaksü atema political aser administrative teyari kanga nungdaker" ta Mission Director, National Health Mission (NHM) Nagaland Dr. Ritu Thurr-i ashi.

"Asenoki Viral Hepatitis indang tebilemstü ya tematiba jenjang nung inyaksüla. Governor, Chief Minister aser Chief Secretary levels nung inyaksüla, Iba alizüng atongtsü atema senotsü teyari nungdaker" ta pai ashi.

2016 küm World Health Organization (WHO)-i 2030 tashi nung Hepatitis samatsütsü sangoktsü. Iba tenangzükba nung sign asürtem rongnung India dena lir, ta Dr. Thurr-i ashi.

India sorkari National Viral Hepatitis Control Programme (NVHCP) tenzük aser iba ya viral Hepatitis noktangtsü aser azüoktsü atema lir. Iba nung free

screening, diagnostic treatment aser counseling services dena lir, ta pai metetdaksü.

"2016 nungi linük aikati Hepatitis B vaccine amshia Hepatitis B menatepba azüokkogo. Nisung aikati Hepatitis B treatment agir. Alima nung viral Hepatitis keta alir nisung 350 million shi lir aser second 30 shia viral hepatitis agi nisung ka asür" ta Dr. Thurr-isa ashi.

Tashidak tamajungtem rongnung Hepatitis ya ka lir saka iba ya noktangteter aser anepalu süteter. Primary health centre level nunga iba tashidak anepaluteter aser Hepatitis noktangtsü atema free screening, diagnostic facility, treatment den counseling service agütsür, ta paisa ashi.

15th Finance Commission kübok Nagaland-i diagnostic facilities nguogo aser kobi melii state kübok Community Health Centre aser Primary Health Centre ajak nung iba ya amenoktsü, ta paisa shisem.

"Na taküm ka dang lir aser na temesen ka dang lir. Hepatitis

ajanga anaprong raksatsür" ta State Nodal Officer NVHCP Dr. M. Nukshisangla Jamir-i ashi.

"Nü indang temesen ajanga anogo ka nung na taküm lidaksütsü atema mapa 500 tema inyaker, saka viral Hepatitis ya tanemi dang adoker aser tashidak tulu akümba sülen ang shirang aliba meteter" ta lai ashi.

Hepatitis B aser C tamajungba aser anogoshia nisung 8000-i iba tashidak menar ta Dr. Nukshisangla-isa ashi.

"Hepatitis agi shiranga asüba noktangtetsü kechiyong vaccines lir. Hepatitis B aser Hepatitis C nungi taneptsü angutsü atema treatments aika lir" ta laisa shisem.

World Hepatitis Day sentong ya Kripa Foundation, NVHCP, Govt of Nagaland, CDC, PATH aser CAD Foundation külemi ayongzüka among.

Iba sentong nung Medical Advisor, Project Sunshine, PATH Dr. Kughavi Yeptho-i "HIV & Viral Hepatitis" aser Kripa Foundation nungi Renbonthung Tongoe-i lokti teinyaktsü indang onüktem jembi.

"Future of Journalism" nung osangbenertem arangshi



Kolkata, July 28, 2023 (TYO): "Future of Journalism" ta ser anogo ananü Meridian International-i US Consulate at American Centre, Kolkata den külemi ayongzüka agiogo.

Tanü Artificial Intelligence aser Immersive Technologies ajanga journalism maparen melenshir aser Virtual Reality (VR) o Artificial Reality (AR) ajanga tarutsü journalism aser otsü ashiba yimya melenshitsü ta asüba mapang ka nung iba sentong agi.

Iba sentong ya Minister Counselor for Public Diplomacy, US Embassy India in New Delhi, Gloria Berbena-i lapoktsü.

"Alima ya three-dimensional reality, artificial intelligence aser immersive technology leni aoer aser iba ajanga otsü ashiba aser

osang belenba maparen melenshitsü. Anungji onok den yariteper Meridian International-i U.S. Consulate General Kolkata nung Public Diplomacy Team den yaritepa iba sentong ya mapang shitak ka nung ayongzüka agir" ta Gloria Berbena-i ashi.

Iba sentong ajanga India nung journalists, storytellers aser media professionals nem Artificial Intelligence (AI), AR aser VR videos ajanga media literacy aser press freedom nung teyari angutsüba indang tesayubatem agütsür, ta laisa ashi.

Department of State-i AI nung temulung agütsür kechiyong iba ya global technological revolution indang tiyongtsü lir aser iba nung maongka aser tayongzükba jenti lir, ta Berbena-isa shisem.

"United States aser India dena kasa tangatetba aliba linüktemi artificial intelligence lenmang yanglutsüla ta Science Advisor to President Joe Biden Arti Prabhakar-i ashiba ama US sorkari Google aser Microsoft amala IT company tulutem den technology tim mesüi amshiba noktangtsü aser public ajangzüksü atema amshitsü meranger" ta laisa metetdaksü.

Anogo ana sentong ya session balala lemsar agi aser India kübok tesem balala nungi journalists 30 tema aden.

Sarang Nerkar, Subi Bhattacharjee, Parul Wadhwa, Pradeep Gupta, Matt Kim, Max Hao Lu nungeri session balala nung o jembi aser Mihir Satam o Palakshi Nerkar nati VR equipments amshiyim sayua liasü.

UGC-i HEIs dang UGC e-Samadhan Portal sayutsü tuyur

Dimapur, July 28, 2023 (DIPR): Higher Educational Institutions (HEIs) indang website ajak nung UGC e-Samadhan Portal indang link sayutsü atema tetuyuba agütsüogo.

Iba ya University Grants Commission (UGC), Ministry of Education, Government of India

ajanga metetdaksü.

UGC e-Samadhan Portal ya Higher Education Institutions indang khurettem aser tebilemstütem benoktsü atema sabang ka lir. Iba portal nung admissions, examinations, scholarships, fee refunds aser tanga academic aspects

tebilemstütem koktettsü atema inyakyim lir.

Kaketshirtem aser tesayurtemi HEIs indang website ajanga UGC e-Samadhan Portal nung khurettem lemsateptsü akok ta UGC Secretary Prof. Manish Joshi-i sangdong ka nung metetdaksü.

Incident Response System training temogo

Dimapur, Chiteni/July 28 (TYO): National State Disaster Management Authority (NSDMA) aser National Institute of Disaster Management (NIDM), Delhi lungjemer asemnü Incident Response System (IRS) training ayongzükba July 27, 2023 nü takok ngua tembangogo.

Iba training tembangba sentong Advisor, NSDMA, Z Nyusietho Nyuthe-i moatsü aser shilem agirtem nema paisa kulizüing kaket agüja liasü.

State Level Master Trainers nem training agütsü

Dimapur, Chiteni/July 28 (TYO): Office of the Chief Electoral Officer, Nagaland ajanga Election Commission of India den lungjemer aruya aliba Lok Sabha Election 2024 dak sendakba nung State Level Master Trainers (SLMTs) atema Theme wise training cum evaluation stage tasembuba agia liasü.

Iba sentong nung Darsuo Thang, Principal Secretary, Election Commission of India dena liasü.

Pai sentong nung mapang tatsüka agia jembidang, Indian

democracy ya alima nung democracy tajungtiba rongnung ka lir, ta ashi aser yangji ajaki shilem agiba atema pelaba lemsatep.

Paisa election inyakyim nung State Level Master Trainers temi tongti shilem agiba indang jembia liasü.

Iba training nung State Level Master Trainers ya them pongu kuma lemsa aser mangatetba jangjashia jembishinüa liasü.

Iba session nung SLMTs temi presentation agütsü aser session tasembuba nung evaluation agia liasü.

Mkg. nung manemertem ketasena anepalutsü shisalemsatep sentong aka



Mkg. nung manemertem ketasena anepalutsü shisalemsatep sentong akadang State Commissioner for Person with Disabilities Wt.Diethono Nakhro-i jembidang tangokba noksa.

Mokokchung, Chiteni/July 28, 2023 (TYO):

Tanü Mokokchung Deputy Commissioner Conference Hall nung District Administration Mokokchung aser Mokokchung District Disabled Forum (MDDF)-i ayongzükba aser State Commissioner for Person with Disabilities, Nagaland: Kohima Office ajanga nungita nübur shirnok tangar ama mabensai manemertem (disabled) lir, parnokji koda tangatetba tajung agi ketasena anepalutsü aser meimtsü iba indang shisalemsatepba sentong ka agiogo.

Tanu iba sentong nung State Commissioner for Person with Disabilities Wt.Diethono Nakhro-i jembidang nüburtemi manemertem anepalutsü aser meima yaritsü asoshi atsüayong masütsülata ashi.

Laisa manemertem asoshi temeten aika lir, anungji nüburtemi manemertemji senzüka meyütsüi tensa ajak

nung angateta yaritsü nungtaker, talisa kitsük kirong, anentsü aser ano tzümetsüing lendong amala nung parnok dang kanga aria bilema yaritsülata ashi.

Nagaland nungbo manemertemji kanga dang tia maka junga anepalu masur, talisa tanurtem school-i aor maor aji sünga memetet, anema alir tanur aser manemi ali tanur ajakji school-i aotsü kasa temeden lir, anungji school nunga parnokji ka nungi ka angazükdaktsüsüla ta laisa ashi.

State Commissioner for Person with Disabilities Wt.Diethono Nakhro-isa manemertemji pei tashi aser sempet yari lokti nunga shilem agidaktsüsüla parnokia anema alirtem ama lokti nung shilem tajung agia teyari agutsüteter aser pei temedena jembiteter, Nagaland nung sobaliba benjung aika dang lir, item sobaliba benjung nunga parnok den apet shilem agidakja parnok ajungshitsü kanga dang

nungtakerta ajungshia ashi.

Kasa sentong Project Associate, Caritas India Wt.Arenlila ajanga Mokokchung nung manemertem jenjang aser parnok inyakyim ajak tejangja rasaa metedakja liasü.

Sentong nung District Administration nung Mokokchung Deputy Commissioner, Ao Senden nungi aser District Welfare Officer parnokia o tatsütsü jembiba den Akangmongba ajanga ken tajung ka tena sentong lemladaktsü, aser sentong tenzüka Chang Baptist Church Mkg. Pastor Wb.Ngaku Chollen ajanga sarasademba den MDDF tir Imkongnungchet Kichu ajanga tepela o jembi aser Kr.Abeinuo EAC ketdangsuba nung agi.

Iba sentong nung manemertem, yimsüing balala nungi yimsüsürtem aser department officer balala arua iba sentong nung aden.

Mokokchung nung gari totzü tendanga jaja



Dimapur, Chiteni/July 28 (TYO): Mokokchung town telungzük aser temeket nung totzü ayokdak petrol pump tem ajungbena July 27, 2023 nü District Administration Mokokchung, DEF, Legal Metrology and Consumer Protection, Food and Civil Supplies aser Ao Kaketshir Mungdang ajanga semdanga liasü.

NHAK nung RBSK Mobile Health Team atema training agütsü



National Health Mission, Nagaland kübok Rashtriya Bal Swasthya Karyakam (RBSK) Mobile Health Team züngsemtem atema Modular training ka Naga Hospital Authority Kohima (NHAK) nung agütsüdang tangokba noksa ka nung shisalen sayurtem aser training nung adeneritem angur.

Kohima, Chiteni/July 28 (TYO): National Health Mission, Nagaland kübok Rashtriya Bal Swasthya Karyakam (RBSK) Mobile Health Team züngsemtem

atema Modular training ka Naga Hospital Authority Kohima (NHAK) nung July 24-28, 2023 anogotem agüja liasü. Tanurtem temang reprangba nung tongtipang osang aser

iba training ya agüja liasü.

National Health Mission kübok Ministry of Health & Family Welfare, Government of India ajanga Child Health Screening and Early Intervention Services nung rangloker Rashtriya Bal Swasthya Karyakam (RBSK) tenzüka liasü.

Tanur ajak pei dak aliba sempet amshitetsüsa takum tajung agütsüsü mechi sentong yanglua inyakba rongnung Rashtriya Bal Swasthya Karyakam ya ka lir aser iba yagi tesem balala nung tanur ajak nem teyari balala agütsür.

Iba sentong nung tanurtem tasoba mapang nungi arishi küm 18 tashi 4 Ds- Defects at birth, Diseases, Deficiencies aser Development delays atema screening agir aser yangji common health conditions 32 lir.

Temang nung timtem kar anepalutsü asoshi tanurtem nem

tekeraba nung intervention services aser follow-up care amala district level nung agütsür. Item teyari ya angati asünung parnok kibongtem temang anepaludang sen indokba ajemtsür.

Iba training nung shisalen sayur ya Dr. Tinurenla Anichari, Nodal Officer, RBSK; Dr. Sedengulie Nagi, Sr. Specialist (Pediatric) NHAK; Dr. Kedozeto Punyii, Consultant (ENT) NHAK; Dr. Mereninla Senlem, Medical Superintendent, Mon; Dr. Sanozulu Kezo, Specialist (Pediatric) Longleng; Dr. G. Thong, Specialist (Ortho) Longleng; Dr. C. Wathsutho Nyuthe, MO (Oncology) NHAK; Dr. Temsu Longhar, SIO-UIP; Dr. Ruokuohelie Rutsa, SNO, NTEP aser Dr. Neisakho Kere, SNO, NVBDCP, DHFW nungertem liasü.



July 28, 2023 nü Chennai nung G20 Environment & Climate Sustainability Minister tem senden nung Environment, Forest & Climate Change Union Minister, Bhupender Yadav-i Indonesia Minister of Environment & Forestry, Siti Nurbaya Bakar (abelen) agizükdang tangokba noksa nung angur.

Lok Sabha nung bill 3 agizükbaji temzüng alema lir: Opposition

New Delhi, July 28 (Agencies): Hokolbarnü Lok Sabha nung opposition MP temi Manipur onük nung Ato kilonser, Narendra Modi-i sangdong ka agütsüsüla, ta takhangba aitba mapang minute 30 tsüingda bill asem agizükogo. No-confidence motion agitsü lia sorkari bill asem agizükba ya temzüng alema lir, ta opposition lenirtemi aitsüogo.

Hokolbarnep Lok Sabha senden tenzükbä sülen minute ishika tsüingda senden thinena liasü. Nikongdang 12:35 ako nung senden tanaben tenzükdang sorkari ozüing asem benoka agizüka liasü, iba sülen senden thinen.

Lok Sabha nung agizükba bill asemji - National Nursing and Midwifery Commission Bill, 2023, National Dental Commission Bill, 2023 aser Mines & Minerals (Development and Regulation) Amendment Bill, 2023 lir.

Anepdang senden tenzükli Lok Sabha nung Congress lenir, Adhir Ranjan Chowdhury-i, 1978 küm May ita nung no-confidence motion benokdang

kasa anogo nungjisa o lemtepa liasü, ta ashi.

Ibaji langzua Lok Sabha Speaker, Om Birla-i, no-confidence motion atema o lemteptsü asoshi pai anogo ka agütsüsü, ta shia maneni Question Hour agitsü metetdaksü.

"Temzüngtem kübok asenok atema anogo 10 lir ta ashir," ta Minister of Parliamentary Affairs, Pralhad Joshi-i metetdaksü. "Kodang nai (Speaker) telemtetba agidir idangji o lemteptsü atema onoki melunga lir," ta paisa shisem.

Iba sülen Birla-i nikongdang tashi senden thinena liasü.

12:07 ako nung Minister for Education, Dharmendra Pradhan-i Indian Institutes of Management (Amendment) Bill, 2023 benok, ajisüaka iba bill magizük.

12:09 ako nung opposition züngsemtemi longkak aitba mapang nung Mines and Minerals (Development and Regulation) Amendment Bill, 2023 benoka agizük. Iba bill ajanga Mines and Minerals (Development and Regulation) Act, 1957 melentsü.

Iba sülen National Nursing and Midwifery Commission Bill, 2023 aser National Dental Commission Bill, 2023 benok aser mapang tatsüka tsüingda bill anapronglaji agizüka liasü.

National Nursing and Midwifery Commission Bill, 2023 ajanga Indian Nursing Council Act, 1947 melentsü aser National Dental Commission Bill, 2023 ajanga Dentists Act, 1948 melentsü aser iba ozüing kübok National Dental Commission, Dental Advisory Council aser autonomous Board asem tentetsü.

Tesülen osangbenertem den jembidang AAP MP, Raghav Chadha-i, "Lok Sabha Speaker-i 'no-confidence motion' agizükba sülenbo Parliament nung bill magizüksüla, ajisüaka Parliament nung bill aika benoka agizükba asenoki ngudar," ta metetdaksü.

Brihostibarnüa Congress MP, Manish Tewari-i, Lok Sabha nung no-confidence motion agitsü lia bill maneni agizükba ya 'tia maka', ta metetdakja liasü.

Taküm tang tashi nung talidak malir tanur 1,550 kümzükogo: Centre

New Delhi, July 28 (Agencies): Taküm küm tenzüker tang tashi nung linük tesem balala nung ki mali nemzür tanur 1,550 dak tema kümzükogo, ta Hokolbarnü sorkari metetdaksü.

Lok Sabha nung tasüingdangba ka langzüdang Women & Child Development

Minister, Smriti Irani-i, National Commission for Protection of Child Rights (NCPCR)-i tesem balala mita aoba mapang nung talidak mali lenmang nung nemzür tanur 1,551 kümzükogo, ta metetdaksü.

Tanurtemji kümzükba sülen NCPCR-i tesem balala nung Child Welfare Committee

(CWC) ket nung agütsüogo, ta Irani-isa metetdaksü.

NCPCR-i item tanurtem maitsü jangjatsü atema maparen tenzükgogo, ta lai metetdaksü.

Tang tashi nung state 24-i talidak malir tanurtem aika aliba tesemtem NCPCR nem metetdaksüogo, ta laisa shisem.



July 28, 2023 nü Gandhinagar, Gujarat nung Semicon India Conference 2023 nung Union Minister for Communications & Electronics & Information Technology, Ashwini Vaishnaw-i Ato kilonser, Narendra Modi nem nüngo ka agütsüdang tangokba noksa nung angur.

ED Director kümsük atsünglangtsüba atema opposition-i sorkar aitsü

New Delhi, July 28 (Agencies): Enforcement Directorate (ED) Director, Sanjay Kumar Mishra kümsük taküm September 15 tashi atsülangtsüba ya yimtenren tsütsülen nungi lir, ta shia opposition party temi BJP-i aniba Centre sorkar aitsüogo.

Opposition lenirtemi, ED Director kümsük atsülangtsüba ya tiyazü nung opposition lenirtem anema ken o benokba ajanga INDIA nükjidong nung lir, ta ashi.

ED Director kümsük atsülangtsütsü atema mepishiba ken o angadanga mapang nung Supreme Court-i, ED department nung Director menden atema Mishra dak alaka nübo tetemsü mali asü?, ta asüingdanga liasü.

Ajisüaka Centre-i Supreme Court dang, tang tagidak FATF review atema Mishra maneni inyaka alitsü nungdak, ta ashi.

Ajioda Supreme Court-i Mishra kümsük taküm September 15 tashi atsülangtsüogo.

Centre-i mapang talangka kümsük atsülangtsütsü mepishia liasü, ajisüaka Supreme Court-i mapang ajema atsülangtsü.

Hokolbarnü Parliament kima osangbenertem den

jembidang Rashtriya Janata Dal (RJD) MP, Manoj Jha-i, Mishra kümsük atsülangtsüba ya ozüing alema lir aser iba ya INDIA (opposition teloktep) tashi meitdaksütsü atema lir, ta metetdaksü.

Samajwadi Party MP, Ram Gopal Yadav-ia, Centre sorkari opposition lenirtem anema ochimashi ken otem bebnoktsü atema asalentong yanglur, ta ashi.

Rajya Sabha nung Congress deputy lenir, Pramod Tiwari-i, tamalen BJP-i Bihar, West Bengal, aser Jharkhand state tem nung sorkartem chireptsütsü merang saka tamakok ngua liasü, aser tang parnoki opposition lenirtem anema ED ama agencies amshir, ta aitsü.

Trinamool Congress nungi Sushmita Dev-i, ED ya BJP indang hadir ka kümogo, ta aitsü.

Laisa Bihar, West Bengal aser Jharkhand state tem nung sorkar tem anema iba agency amshiba metetdaksüba den külemi, ED tongti kümsük atsülangtsüba ya INDIA teloktep tashi meitdaksütsü nükjidong nung lir, ta aitsü.

2024 küm Lok Sabha election nung BJP anema tokteptsü atema tawa opposition party 26-i INDIA teloktep tenteta liasü.



July 28, 2023 nü Bengaluru nung state Transport Minister, Ramalinga Reddy-i BMTC atema electric bus semzüksüba sülen pa den keddangsertem bus nung mener aodang tangokba noksa nung angur.

WB nung tsüraburi iPhone 14 ka alitsü atema ita 8 jabaso ayok

Kolkata, July 28 (Agencies): West Bengal nung kinüngtsü aser kinüngbu ka nati iPhone 14 ka alitsü aser state tesem balala sema Instagram Reels yanglutsü nükjidong nung arrshi ita 8 jabaso ka ayokba sülen police-i tenaprongla puogo.

Jaydev aser Sathi Ghosh nati kiyonger (aibelener apuani) jabasoji joko mapang tatsüka kidang manguba ajanga tena kanga süngmanga liasü.

Tanur tsüraburtemji kanga sensaker, ajisüaka tena ket nung iPhone 14 ka aliba ajanga kiyongertemji kanga süngmangtepa liasü.

Tang iPhone ka jenzangji sen 70,000 shi lir.

Kiyongertem tena dak melung malemba agi Trinamool Congress councillor, Tarak Guha nem iba osangji metetdaksüba sülen Guha-i police dang tena anema bushisüingdangtsü mepishia liasü.

Guha-i ashiba agi, tamalena apuani jagi arrshi küm tenet jala ka ayoktsü meranga liasü.

Police-i asüingdangyaba mapang nung tanur tetsü jagi kinüngbu tenati iPhone ka alitsü atema tangar dang jabaso ayok, ta nangzuka liasü.

Police-i apuani na denji tanur alizükla, Priyanka Ghosh-a pua Khardah police station-i anir ogo.



TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI 29, 2023

AI aser VR agi nisung melentsü na ?

Asenok dangi smartphone aruba agi asenok mapa aika nung tajangzük ngudagi, kechiyong mapa teimbaka asenok tonga aotsü melen kidang mena yur inyaker. Iba jagi asenoki meteteteta asen mapang aser senotsü kümzük aser tesem balala nung aliyonga külemi aliba danga taoba sensaksemeter. Aji oda, tesem kati nungdak ka aotsü alinunga ali-mali osang agiteper külen dang aoer aser mobile phone ajanga dang shishilembar asünungji mapa bolua shishilembadaka maor. Item tajangzüktemji dang masü, joko mobile aliba agi osangtsüsang angatsü aser noksa reprangtsü atema radio aser television menügdaker aser noksa agitsü asoshia camera menügdak kümogo aser noksa agidak bushia aotsüa menügdaker. Ano, mobile phone aliba ajanga tangbo asenok sen bener jajatsü menügdak kümogo aser bank tonga aotsüa aibenbo menügdaker. Atangji, ano külenbo smartphone amshiba agi asen mapang aser senotsü amajok nung endoker ta ashitsüsa asenok aikati amshir, kechiyong smartphone amshia nungdak inyaksü aser kidang mena yur sen aatsü melen amuia ma phone amshir aser anügdanga kecha meinyak phone mesükshia kazür. Aji oda, mobile phone aruba ajanga anogo nung mapa aika inyaktetsü melen whatsapp aser YouTube reprangdang mapa kata matemer. Iba amai lia ano asenok melen mapa ajak inyadaksütsüsa Artificial intelligence (AI) ajanga inyakba mapatem ka khen ka khen ta tonga arutsü. Atangji, joko tanga asen matongdangyongi kishi lapoktsür aser asenok maoyonga anünglen nungi drone ajanga nungdak oset bener yoker aser noksa ajak tangoka bener arua agütsür. Aji oda, smartphone nung internet ajanga computer sentong balala agi asenok nungdak ataloktsür. Taoba mapang iba yimobilem nung lemsatepba ama joko AI agi ChatGPT ajanga aseni jembitsüba onük dena renemtsür aser aseni metetnua asüngdangba ajak langzür. Kasaji alima nung atalokba osangtsüng dena metetdaksür. Aji dang masü saka AI den VR (Virtual Reality) inyakyim agi asenok tongogo, anungji alima tesem balala nung liaka kati ka reprangtepa jembir aser temang tonga mouaka tonga orr repranger amai saisapongsentong repranger aser senden nung adener. Joko, AI aser VR aruba ajanga asenok shirangba mapanga doctor tajung alidak bushia tonga aotsü nungdak madoktsü, kechiyong asen alidak inyaker doctor-temi operation agidang talang nungi süaka VR ajanga doctor tajungtem tonga arur külemi operation agir amai agitsü. Aji oda, aluyimba tsütsüa AI aser VR ajanga tsüngsang mopong takzükba nungi shir tzünüsenpongtsü yokba, alu inyakba aser chiyongtsü züsenteta ayokba tashi nung nisungtem anisüngzük aser tajangzük tulu angutsü. Ajisüaka, alima nung nisungtemi metettsüba kaji AI aser VR tem ya nisung melen masü saka nisungtem mapa nung yaritsü asoshi nisungi yanglubatem lir. Anungji, koba mapa nung südirsüaka AI nem asenok anishidaksütsübaji masü saka asenoki AI anishitsüla. Aji oda, AI aser VR mapatem agi nisungtem azümasen aser shisa maka kümdaksütsüsa masü saka mapa teinyakba aser shisatakaba akümtsüla. Nisung kar meranga inyakba agi smartphone adok nung, asenokbo kecha meinyaki aji amshia among dang sensak aten ama mesüi, asenoka joko AI aser VR ajanga taküm tajungba aser takarba küma alitsüsa temetetba aser tangatetba nung renemtsüba mapangji tang lir.

OLEMSABANG

United Himalayan Mission (UHM) Ajanga Tsüngrem Mapa Inyakba Temoatsü Tatsüka Lemsateper

N.Toshi Ao Diphupar, Chairman, UHM Board

Asen Kibuba Yisui nongloktsüba (Matt.28:18-20) atalokdaksütsü asoshi asen Naga nunger Tsüngrem tenzükern parnok asem (1). Rev.Dr.P.Dojo, (2). Rev. (Lt) Vepari Epau, aser (3). Rev.(Lt) Thanglo Kath longjemer 1990s nungi kodaser North India aser Nepal leni Yisu osangtajung ya yoktetsü ta kanga sarasadema lenmang bushia tenzük. Asenok ajaki meteta aliba tanü tashi North India ya Yisu osangtajung agi metongi aliba linük lir aser Khristanpur reshikangba lima lir, kechiyong iba lima ya Hindu nungertemi amokpanger aliba lima lir. Ano Nepal lima yaa osangtajung sayutsü nokdanga aliba lima ka lir.

Anungji parnok kanga sarasadema lenmang aika bushidanger külen item lima dangi Yisu osangtajung abentsü lenmang tajungtibaji school ajanga asütsü ta bushitet. (Missionary otsü nung school ajanga osangtajung sangdongba nung takok tulu anguba otsü aika asenokia meteta lir). Iba tangatetba nung 2001/2002 küm English medium school ka tenzükdi ta longjem aser ibaji Nautanwa town (U.P) nung tenzük. Nautanwa ya Nepal Border nung lir aser Gorukhpur Train Station nungi 90 Km shi North leni atur. Iba ya 100% Hindu nunger aliba Town ka lir. Yangji 2002 küm English medium school ka tenzük aser iba school tenüngji Mt. Hermon English school ta aja, saka tanübo Mt.Hermon Academy ta ajar.Iba school tenzüktsü asoshi ali tila ka alitsü nungdaka aküm aser lenmang aisü bushitepa ano par nisung kar (Hindu nunger) den tembar yimtepa aser school tenzükba nükjidong aser temoatsü ajak angatetdakja mapang talangka agia bushiteper tesülen ali tila ka yimti tezülen alia yangji iba school ya jara ki tila yanglua tenzük.

School ki yanglua aodang tenokdangba aika ajuru, saka tesüngmangtsü Tsüngremer sayatenya nung iba school ya Nursery section 2002 küm tenzüktem.

School tenzükba nükjidong asem:

1. Iba school ajanga Yisu Osangtajung sayua arogo tenzüktsü
2. Par nübor rongnungi lennir tajung adokdaksütsü, aser
3. Tanü putu den sütepa education tajung agütsütsü

School tenzüktsü shisabulo

United Himalayan Mission lennirtem asoshi shisabulo aika liasü. Reshikangshi aliba lima nung ano school dak sendakba nungdaktem den, sen-o-tsü maka den balaka yangji lia tenzüktsü tapet nisung angutsü kangasa tasak liasü. Tetenzük dangbo item ajakji asenok nisung asütsüla. Saka kong nungi angutsü? Ano tenzükertem anguyonga parnok teyari/ita sen koda? Ano tebilemstü kaji parnok asoshi talidak ki koda? Iba lima nung Hindi dang jembir asü nung item tesayurtem/tenzükertem asoshi oshi-oben angazükdaksütsü ano aika...? Saka item ajak atendanga ano shisabulo tulutibaji iba school nung azüngtsü students marura koda? Kechiyong iba mapang tashi nungbo par nübertemi iba school ya Khristantemi Naga lima nungi arua lapoker aser student-temji Khristan kümdaksütsü tasa asar ta o aika adoka jembimeso aser odia anema apusotsü tenzük. Lenmang aika shibangtsü aser senüsempongtsü aser inyaksangshitsü kanga mesüha aküm. Saka item shisabulo ajak atendanga item lennirtem tali tamang akangshi aser Naga lima nung arogo aser Kibong aikati sarasadem nung aser akok tashi rongsen agi yartiptsü tenzük.

Mt.Hermon Academy yamai tenzük:

United Himalayan Mission anepalutsü asoshi over all Mission Incharge ka kanga nungdaka aküm. Kodang iba nungdak atema sarasadema liasü, mapang shitak nung Chakhesang Mission Society (CMS) ajanga par nisung kanga bendanga agütsüba tenzükern tajung ka Mr.(tangbo Rev.) Thupuzhoi Dojo UHM Missionary asütsü 2003 küm yok. Tanü tashi Pa aser kibong ajaki kanga bendanga agüja inyaka arur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Eritrea linük nung pastor ana tepuokdak anogo 7,000 jungogo



Pastor Haile Naizgi aser Evangelical lenir Dr. Kiflu Gebremeskel na noksa nung angur.

July 28, 2023: 2002 küm Eritrea sorkari linük nung tamangba yimsü temeden anema ozüing ka benoka liasü aser iba ozüing kübok Sunni Islam, Eritrean Orthodoxy, Roman Catholicis aser Lutheran dak alaka tanga yimsü benshitsü memelar; iba mapang nungjagi tenzuka ken o mangadangi Khristan noklang aika jail nung puokogo.

Eritrea linük nung pastor anabo jail nung puokba sülen tawa anogo 7,000 jungogo. Pastor Haile Naizgi ya Full Gospel Church of Eritrea nung Chairman teinyakdak lia apu.

Full Gospel Church of Eritrea kübok house church group 150 shi lir.

Sorkar ozüing kübok item house church groups shibangdaksüer ajisüaka official süa registration agitsü atema application form agütsür. Khristantemi item forms ji jungjunga fill up sür agütsüyonga sorkar ketdangsertemi Arogo lenirtem nem tang tashi osang kecha memetdaksür.

2004 küm May ita nung Pastor Haile pua jail nung puokba sülen tawa anogo 7,000 jungogo.

Ano Eritrean Evangelical Alliance nung chairman aser

Full Gospel Church executive committee nung züingsem, Dr. Kiflu Gebremeskel-a 2004 küm May 23 anepdang apuba sülen jail nung anogo 7,000 jungogo.

Pastor Haile ya tamalen World Vision nung accountant inyaka liasü. Tang pa Asmara nung aliba Police Station nung puoka lir. Dr. Kiflu Gebremeskel ya taoba mapang University of Asmara nung mathematics professor liasü aser pa-a Asmara nung aliba Police Station nungsa puoka lir.

Eritrea linük nung Khristan lenir anaji jail nung puokba sülen taoba hopta anogo 7,000 jungogo. Lenir ana jail nung puokba sülen anogo 7,000 abensaba anogomong nung VOM USA nungi Todd Neddleton-i, "Ibaji (anogo 7000) hopta meyrjang ka parnok kibongtem dang nungi pilaba den kasa lir. Tena apudang par chirnurtemji kanga tanur liasü saka tangbo tanurtemji college graduates lir aser karbo tsürabur-a kümogo (kibonga kümogo). Tesüiba anogo 7,000 tsüingda tenati parnok kibongi ajangshiba kwi majangshidang alitsü? Tebu ka aser oboula ka ama shisadangra tenati Khrista aser Pa yimli atema tenati tenla tulu agütsüogo, ta ni temelung shiranga bilemer," ta

metetdaksü.

Tawa video podcast 'Closer to the Fire' nungi Greg Musselman-i interview ka agiba mapang nung Release Eritrea telok nungi Dr. Berhane Asmelash-i linük nung Khristan lenirtem aser tamanger 400 shi ken o mangadangi tepuokdak puokba osang metetdaksa liasü.

2004 küm nungjisa Eritrea nung May 13 nungi May 27 tashi nung ano Khristan lenir ana pua liasü; osangtajung kentener ka aser evangelical lenir ka pua liasü.

2004 küm May 13 nü Asmara nung aliba Rema Evangelical Arogo nung züingsem, Helen Berhane apu. La dang Khristan yimsü tokjang aser osangtajung ken atenba anentsü nangzuka shidi ka nung sign süang ta ashi, ajisüaka lai sign masüba agi tang tashi Mai Serwa military camp nung aliba shipping container ka nung puoka lir.

Kasa anogo nungjisa police-i Asmara nung aliba Rema Evangelical Arogo nung Pastor Tesfatsion Hagos aputsü merang saka pa kidang maliasü. Ajisüaka anogo pezü lir pai Massawa yimti semdangba mapang nung police-i pa apu. Pastor Hagos'er tanur asem lir aser tang tashi pa kong aliar memetet.

Impur nung Lokti Yanglushi sentong agi



July 28, 2023 nü Impur nung ABAM Zone 1,2,3, & 4 kübok aliba Arogotem nung toklanga tenzükertem "Lokti Yanglushi" sentong nung adenba sülen tangokba noksa nung angur.

Impur, Chiteni/July 28 (TYO): ABAM Social Concern ajanga ayongzuka maneni ABAM nung Zone 1,2,3, & 4 kübok aliba Arogotem nung toklanga tenzükertem asoshi "Lokti Yanglushi" sentong July 28, 2023 nü Impur nung agiogo, ta ABAM Executive Secretary, Rev.Dr. Mar Pongener-i sangdong ka ajanga

metetdaksü. Sentong nung Sannükertemi anir toklanga tenzükertem Arogo 62 nungi parnok 244 arua aden.

Iba sentong nung shilem ana lemsaer agi- mezüingbuba nung Tzüüzüing-ozüing angazükshiyim onük agi aser iba onük Mr. Taka Masa Ao ajanga jembia liasü, tana buba nung Temesepba

Chiyungtsü nokdangyim onük liasü aser iba onük Mr. Maong Jamir-i jembia liasü.

Arogotem nung temesepba chiyungtsü achi-ajemer anepalua inyakdang aser ochi mapa nung nokdaksü Tsüingremer taochi agi aniangma ta sarasademer, ta kasa sangdong ajangasa lemsateper.

ANOGO ABEN TSÜNGREM DEN

Shitakba Nüji

T.Ken 119:41-48

Aikati Tsüingremer ozüing aser nisunger nüjibaji tsükchir lir ta ashir. Parnoki ashir, "Ni nüji aginer, ni mulungba mapa inyaksü nüji aginer, ni mulungba mapa inyakner." Parnok koda tai lir. Tsüingremer ozüing aser ne nüjiba teka amteper aor. Tekong 45 jagi tejangja ashir: "Aser ni matitaki jajatsü; kechiyong ni ne ozüingtem benshi."

Nüjibaji kechi? Kari ashitsü pei kechi inyakner agi inyaksü maongka. Saka ibaji nüjiba masü. Shitakba nung alima nung alar tamajungtiba lir- ne tejangraba agi dang azüokdaksübaji alar akümba lir. Shitakba takümüji Tsüingremer ochiba agi azüokdaksüba aser Pa temeimi jangradaksüba lir. Temeim nung nüjiba amshiba jagi pei a meyrur aser tangara meyrudaksür.

Taküm lenmang ajak nung ibai atangji lir. Talungtsü azüokba kübok talungtsüji anira lemanng ajak nung asenoki talungtsüji anitsü nüji lir, aser tangari asenok dak temulung alemtsü. Asenoki science ozüing nung tashi angara laboratoryji meraksatsü. Shibai kechi oset amshir pai iba oset amshiyim ozüing nung tashi anga amshira pa/la lendongi maitsü. Kodang asenoki ozüingi melaba kübok lidir, asenoki ozüing tashi nungji pelaa alitsü. Charles Wesleyi yamai ashir, "Tsüingremi indokba temenen tashiji raksatsü; Pai puoka alirji nüjisüa chiok." Ano pai ashir, "Nai kü nem agütsüra asenok külemi ochi aser temeim nung pelateptsü."

Na Khristan taküm nung shitakba nüji nung pela lir ma? Melira, nai Pa nem agütsüba ajanga shidakba nüjibaji na akatsü akok. Asenoki Pai mulungba metettsü asoshi Pai Pa O asenok nem agütsü. Pa nem agüjang aser nüjiba tsütsü nai mezüingbuba meraji agiang.

LATTER RAIN REVIVAL TELOKI SARASDEM AYONGER

ANOGO:- 30th July 2023. MAPANG:- 5:00 am to 7:00 pm.

"Oh nüburtem, nenoki mapang ajak nung Pa dak amangang, Pa tsüingdang nenok mulungjang lapokang; kechiaser Tsüingrem asen jenokdak lir." T. Ken 62:8.

Yisu khristai meimchirtem dang maneni inyaksü shia toktsüba rongnung kaji sarasadem ya lir. Aser adangji asenoki koba tia tensa ka ajurudir ajuruaka, kodang sarasademdir takok den tesünep angur anungji sarasademtsüba ya koda jangatemtsü lir. Arung asenok ajak külemi ano item onüktem ya sarasademti:

- i. Oh! Tsüingrem alemli ama onok semdanga Tanüla tashi tzüinglubo ama yokang ta sarasademdi.
- ii. Mungdang (ABAM) nungi tenzükter Arogotem nung tenzükertem aser Tsüingrem tenzükter ajak madak Tanela Temeshi tashi ain mekublokjang ta sarasademdi.
- iii. Süngyanglu külemer tashi anema nokdaktetsüsa asen nubur ajak nem Khrista tashi agujang ta sarasademdi.
- iv. Asen Aor Khristan kibongtem nung mojing teraksatsüba tashi samajang ta sarasademdi.
- v. Naga nung Yimsusurtemi Yisu Khrista mesendoki nübur tenzüktsü sarasademdi.
- vi. Asen lima meketa lendong atalokba ama asenok dak madaloktsü atema sarasademdi.

Pelaba lemsateper:

Iba sarasadem agitetsüsa Kohima Ao Baptist Arogoi tanendak aser chiyongtsü peria renemtsüba den ano Fellowship ajak nung sapang lapoktsüba asoshi teloki kanga dang peleba lemsateper. KABA asoshi maneni sarasademtsüdi.

TEMETETSÜ

- i. Sarasadem mapang aguja aliba 5:00 AM nungi 7:00 PM tashi nungji nai molungba mapang ka nung gonda ka (one hour) agiteta agitsü akok.
- ii. Agüja aliba sarasadem onüktem den ano naia inoksema agi nunga tajungba asütsü.

Tayonger Tenüing nung;
Rev. Dr. L. Kari Longchar.
Rev. C. Teyong Kichu.

AO OSHI ANGAZÜKDAK:
TANÜ ANGAZÜKTSÜBA OJANG



Tir Yimyim

Rogo

- (n) lokti tentet nung adenertem, kasa pur (group members)
- * Tanü yimten mapai ozü rogo kar ao.

Rogonü

- (n) hapta nung anogo troknübuba (Friday)
- * Yashi rogonü liasü .

OLONG PAITEP # 6590

1			2			3			4
5									
					6			7	
		8							
	9						10		
				11					
12							13		
				14					15
16									
						17			
18									

TIPLÉN

- 3. Rajema lir - (5)
- 5. Komo temaitsü - (5)
- 6. Ali nung temokok-i nendak - (6)
- 8. Ochi masü - (5)
- 9. S _ _ _ r - (3)
- 10. Tebang nung enok - (4)
- 11. Lemzük - (3)
- 12. Tanemi - (4)
- 13. Maneni - (3)
- 14. Ana _ _ _ _ la - (5)
- 16. Telemsa - (6)
- 17. Saklok - (5)
- 18. Kua ta ashi - (5)

LANGTSÜNGLEN

- 1. Ali nung enok - (4)
- 2. Tamajung aküm - (5)
- 3. Teinyaktsü - (4)
- 4. Iba küm - (5)
- 6. Aonung tesü - (7)
- 7. Tajatsü - (6)
- 8. Yimya-tsüya - (6)
- 12. Tzüküm nung anguba ali - (5)
- 13. Hopta nung telemsa ka - (5)
- 14. Agishi - (4)
- 15. Tekong sobutsü - (4)

OLONG PAITEP # 6589 TELANGZÜBA

TIPLÉN:

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN:


- 1. Tenükjang, 2. Luden, 3. Kioktsü,
- 5. Lenti, 7. Tajangzük,
- 11. teronem, 12. Sempa,
- 13. Jahaz.

NAI-A YA METETTER MA



Tila tanurtem talisa arishi küm pongu teküpbok chanutem aika teketsüla teloktep raksar. Iba dangji medical agi "radial head subluxation" ta ajar. Iba noksaji yangi angur. Anungji tanur chanu ajungshidang ajaki kanga kümdangtsüla.

Noksa nung meputepi aliba 8 bushiang



Karbi nunger lennir Kajir Ronghangpi indang mungdang amonger



Diphu, July 28, 2023
(Agencies): Hokolbarnü Matipung nung aliba Arboretum cum Craft Centre nung anogo asemnü international conference ka tenzükogo. Iba sentong ya 'Oral tradition of the Karbis: Memorising Kajir Ronghangpi - The Rhinoceros

Lady' nung ajemdaker agir. Kajir Ronghangpi ya tang aliba Kaziranga National Park nung liasü ta otsü agi ashir. Alima tesem balala nungi teshimtet nisung 54 tashi iba mungdang nung adentsü arua lir. Parnok rongnung researchers aser scholars dena lir aser

parnoki Kajir Ronghangpi indang papers den tanga onüktem lemsateptsü.

December 5 nü 'The Rhinoceros Lady' ta ser anogo amongba nung shilem ka ama iba mungdang ya ayongzüka amonger.

Iba sentong ya Art & Culture department, Karbi Anglong Autonomous Council-i Assam University (Central University Diphu Campus aser Diphu Government College den yaritepa ayongzüker.

"Iba mungdang ajanga Kajir Ronghangpi aser lar lushi (Kaziranga National Park) jangshitsür" ta Karbi Anglong Autonomous Council (KAAC) Chief Executive Member (CEM) Tuliram Ronghang-i ashi.

Mungdang lapokba sentong nung mendenji Executive Member (EM), KAAC, Art & Culture Surjya Rongphar liasü.

Meitei nunger 600 temai Mizoram toktsür ogo

Aizawl, July 28, 2023
(Agencies): Tawa lisapur tetsür ana mangsa anir senzüba video ka prokshiba sülen Meitei nunger 600 temai Mizoram toktsür ogo ta police ketdangsür kati ashi.

aitsü tsübur ta pai ashi. Mongulbar tashi nung Mizoram nungi Meitei nunger 600 tema Manipur-i ogo. Bodbarnü aoertem osang mali, ta Ralte-i ashi.

nunger 3,000 shi lir aser parnok teimba ka tesayurtem, kaketshirtem aser mapa inyakertem lir ta pai ashi.

Mongulbarnü NGO Co-ordination Committee-i Manipur nung Kuki-Zo nunger pusemba sayua Mizoram tesem balala nung lungkak aitba sentongtem ayongzüka agi. Iba telok nung Central Young Mizo Association (CYMA) dena tongti telok pungu züngsema lir.

Taoba mapang telungpur telok kati Meitei nunger dang kümdanga alitsü osang sangoktsüba sülen parnok Mizoram toktsür ao ta Crime Investigation Department, special branch Superintendent of Police Vanlalfaka Ralte-i ashi.

Ajisüaka, Meitei nunger tanishir katibo Brihostibar tashi Meitei nungeri Mizoram toktsür aoba osang sangoktsü.

Chief Minister Zoramthanga, deputy chief minister Tawnluia, minister tem aser party balala nungi MLA temi Aizawl nung lungkak aitba sentong nung aden.

Mongulbarnü civil society teloktemi sentong ka agiba ajanga Meitei nunger lendongi

"Mizoram nung lokti tentetemi tawa lungkak aitba sentong ka agiba sülen Meitei nungeri lendongi ajurutsü tsübuba agi Mizoram toktsür aoer" ta All Mizoram Manipuri Association (AMMA) vice president Rambir-i ashi. Mizoram nung Miete

RSS tanishir Mohan Bhagwat-i Assam semdang

Guwahati, July 28, 2023
(Agencies): Rashtriya Swayamsevak Sangh (RSS) mendenbuba Mohan Bhagwat-i anogo asemnü atema Assam semdangi arua lir.

Shiksha Varg (2nd year) nung adenertem den jembitsü. Iba sentong ya July 12 nü tenzük aser August 1 nung tembangtsü.

Pranta nungi 4, Tripura Pranta nungi 44 aser Manipur Pranta nungi 6 tashi iba training camp nung dendar ta sangdong ka nung metetdaksü.

Hokolbarnü pa Assam kübok Hojai nung aliba Geetashram tonga aru. Iba mapang pai Swayamsevak tem den sensaksemtsü aser Sangh

Brihostibarnü pa Guwahati atong aser iba sülen Hojai-i ao. Asom Kshetra nungi Swayamsevak 151, Uttar Asom Pranta nungi 95, Dakshin Asom Pranta nungi 12, Arunachal

"RSS tanishir Mohan Bhagwat-i iba training nung adenertem den o jembitsü" ta Asom Pranta indang Prachar Pramukh (Media Relations In-Charge) Kishor Shivam-i ashi.



Hokolbarnü Kuki-Zo Women's Forum-i Jantar Mantar, New Delhi nung Manipur nung lisapurtem atema ketdangsubaren balaka meshia lungkak aitba angur. Parnokisa Manipur nung President's Rule meshia takhangba agütsü.



TENÜNGSANG AGÜTSÜR

Mopungchuket Senso Telongjem (MSTK) aser Ao Temolungsür Telongjem (ATTK) Kohima-i **Kr. Moasenla R Jamir**, D/O Wb. I. Rongsen Jamir aser Dr. Watikala zuluba kaket poetry Collection titled **"FOREIGN ENGINE IN FLIGHT - A LIGHT OF PASSAGE IN POEMS"** ajanga award anguba atema tenüngsang tetushi agütsür.

1. "AUTHOR OF THE YEAR 2022 AWARD" by NE8X Official.
2. "INSPIRING AUTHOR OF THE YEAR 2023 AWARD" By NE8X Official for Lit Fist 2023.
3. "GOLDEN BOOK AWARD 2023" in the category "Consciousness Poems" by Wings Publication in association with International Authors Association.
4. "POET OF THE YEAR AWARD" for literary award 2022-2023 by Suenos by Ukiyoto.
5. "BEST POETRY BOOK AWARD" by Yatha Katha International Film & LitFest 2022 talk Edition by NEX Official as Author speaker Honouree.

Ano iba den külemi la mapa tajung atema item award ya angu.

1. "WOMEN FACE OF THE YEAR INDIA 2023 AWARD" conferred by Fox story India.
 2. "WOMEN CHANGE MAKER AWARD 2023" conferred by Women Substance Network & Award 2023.
 3. "INDIA'S RISING DYNAMIC FEMINA 50 UNDER 50 AWARD" conferred by Glantor XMedia.
- Na mapa tajung ajanga yimmer nem konang nüngsang bener aruba atema kanga pelaba metetdaksür. Tsüngremi ne taküm ano maneni moajang ta sarasademtsür.

Sd/-
President, MSTK

Sd/-
President, ATTK

Niger sepaitemi Tir Mohamed Bazoum atsüngdokogo

Niamey, Chiteni/July 28 (Agencies): Tir aliba ki anüker temi par kidang Tir Mohamed Bazoum pua ayuba sülen Niger nung sepaitemi Bodhbar aonung pa menden nungi atsüngdokogo ta ashi.

National television nung sangdong ka agütsüba nung Colonel-Major Amadou Abdramane-i, defence aser security forces ajanga nenoki meteta aliba yimli tatem kati arudaksütsü teletetba agiogo, ta ashi.

"Maneni security tensa majungba, nüburtem aser rongsenketzüng junga ketdang masüba ajanga iba mera ya agi."

Sepaitemi ashiba agi, linük indang arütsü shibangogo aser linük tesem ajunga nung curfew benoka lir. Linük nung institutions ajak anena lir, ta pai ashi.

Abdramane-i iba sangdong zünga ashidang pa müketa sepa tanishir par toku agi pa müketa nokdaka liasü. Par sasa iba telok dang National Council for the Safeguarding of the Country ta aja aser bendanger shingaia teka mamoshitsü metetdaksü.

Elite guard unit nung züngsem temi "anti-Republican

demonstration" nung shilem agir ta Niger indang tir menden ajanga sangdonger aser ano osang balala ajanga Bazoum ya pa alidak sepaitemi pua lir ta sangdonger anogo ka lir iba osang ya sangdonger.

Abdramane-i iba osang sangdong dang tir ya kong ali mesüra pa mapa toktsü asü masüar mejangja.

United States-i tangsa Bazoum chiokang ta ashi.

"Ni tanep Tir Bazoum den jembiogo aser Niger nung democratic yimya nung shimba tir ka lir ta United States-i manokshie bukumer ta pa dang tejangja shiogo," ta US Secretary of State Antony Blinken-i New Zealand nung osangbener danga shi.

"Onoki pa tangsa chiochtsü akhanger," ta pai ashi.

Niger nung mitkar temi sorkar atsüngdokba ya West aser Central Africa region nung 2020 nungi tenzüka tenet buba alitsü aser iba yagi Sahel region nung al-Qaeda aser ISIS (ISIL) den sendaktepba aliba telungpur telok tem den raraba linüktem West-i yariba nung tali tepenjaba akumtsü.

Niger ya linük balala agi

longbanga aliba linük ka lir aser telungpur den raraba nung Western tashi bushiba tempas aser ano sub-Sahara Africa nungi migration anema European Union-i raraba nunga yariteper.

United Nations-ia iba inyakyim ya aitsüogo.

"Niger nung democratic government, tesünep aser yimjung raksatsütsüsa tashiyim amshia tashi rakzüksü merangba khukhua aitsür, ta Secretary General Antonio Guterres-i ashi.

Bazoum anema iba mera agiba ya pa atsüngdoktsü merangba lir, ta African Union and the Economic Community of West African States (ECOWAS) ajanga Bodhbarnü ashi, koba 1960 küm France nungi nüchiso ngur küm ana tejakdang yimjung nung aser democratic yimya nung tashi melenoktsüba mezüngbuba alitsü.

Tan ita ECOWAS commission indang chairman shimtetsang aser Nigeria Tir Bola Tinubu-ia Niger sorkar atsüngdoktsü merangba anema regional bloc lenirtem nokdaksü, ta shia liasü.

Myanmar: Aung San Suu Kyi sorkar meyong ki nung yua lir

Naypyidaw, Chiteni/July 28 (Agencies): Myanmar civilian lenir Aung San Suu Kyi, shiba 2021 küm mitkar temi tashiyim amshia sorkar nungi atsüngdok, la tepuokdak nungi sorkar meyong ki kati anir ogo, ta lar party nungi ketdangsür kati Hokulbarnü ashi.

"Hombar aonung Daw Aung San Suu Kyi high-level venue compound kati anir ogo," ta National League for Democracy nungi ketdangsür kati pa tenüng memetdaksüü ashi.

2021 küm February 1 nü mitkar temi tashiyim amshia sorkar atsüngdokba sülen Suu Kyi ya khen dang ngudanga lir - Naypyidaw nung mitkar

indang courtroom nung lia tangokba noksa mejangja ka.

Mitkar temi tashiyim amshia sorkar atsüngdokba ajanga iba Southeast Asian linük nung mepetmesü adoka nisung million ka dak tema tesem balala nung prokshi, ta United Nations ajanga ashir.

Party ketdangsüri ashiba agi, Suu Kyi-i linük indang lower house speaker Ti Khun Myat ajuruogo aser China indang special envoy for Asian Affairs, Deng Xijuan ajurutsü akok, shibai tang linük semdang.

Ano political party ka nungi ashiba agi, Suu Kyi ya Naypyidaw nung VIP compound kati anir ogo.

Arishi küm 78 tain Nobel Peace Prize ngur alila apuba mapang nungi la temang asoshi shisabuloa liasü, kechiaser mitkar indang court nung la anogoshi amai nokdaka aru.

Ochimashi, ozüng alema walkie-talkies amshiba aser coronavirus tenokdangba nung aibelenba densema ken o balala nung Suu Kyi aija küm 33 tepuokdak ayutsü obendang agüja lir.

La anema ken o jembiba ya tema-tazütsü dang lir aser nüburtemi kanga junga meteta aliba lenir yimtenren nungi atsüngdoktsü atema yangluba hadir ka dang lir, ta rights groups balalai ashi.

Menungra Bilemteter



29-07-2023

Mamatetba Asür Aomeren Imsong nü akümüli tempanger tanü küm ka abensar saka onok den na teti lir ama bilemer. Na teyarinüsang nü yimyatem nüklai arua menungrar .

Tanü na bilemteta kinungertemi sarasademtsür,

Temeim Kinungertem.

**GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA**

NOTIFICATION

Kohima dated the th July 2023

No. ED/EST/GR-IV/APPT/SDEO-PHEK/2011-12:

In continuation to this Office Advertisement of even number dated 5-06-2023 for the post of 1(one) peon (MTS) at the Office of the Sr. Sub Divisional Education Officer Phek, it is hereby notified that on the basis of marks secured in the viva voice held on 04-07-2023, Smti Nutseilu Tsutso has been selected for appointment.

**(WONTHUNGO TSOPOE)
DIRECTOR**

JOIN US AND FLY HIGH

Centre for Development of Advanced Computing (C-DAC)

Ministry of Electronics and Information Technology
Government of India

C-DAC NUNG TONGTIPANG JENJANG KA ATEMA MAONGKA

Post Name	-	REGISTRAR
Pay Matrix Level	-	13A Level (Rs.131100-216600)
No.of Posts / Reservation	-	1 (OBC – NCL)

Komasür apply asütsü: Jangra aliba candidates temi iba sangdong tejangja metettsü asoshi www.cdac.in indang careers page nung angutsü aser online ajanga August 31, 2023 tashinung apply sütettsü.

Note: Iba dak sendakba nung temelenshitsü/tongteprateptsü lira, C-DAC indang website nung dang metetdaksütsü.

Advt.No-CORP/GR.A/04/2023 **Corporate (HRD)**
CBC 06132/12/0016/2324

Heroin gram 31 mechi Singapore nung tasüba temerenshi agütsü

Singapore, Chiteni/July 28

(Agencies): Singapore nung arishi küm 45 tain tetsür ka heroin tuozük gram 31 bena lia apuba mechi tekong nung süngzü inoker alenseta südaksü, koba Singapore nung küm 20 jungnüa nung tetsür nem tasüba temerenshi agütsüba mezüngbuba alitsü.

Saridewi Binte Djamani yagi 2018 küm temesepba mozü gram 30.72 dang tajemba masü shibelenba nung aija Hokulbarnü alenseta südaksü, ta Central Narcotics Bureau ajanga sangdong ka nung ashi.

Djamani nem ozüng kübok maongka ajak agütsüogo aser mapang ajak nung legal counsel agüja aru, ta ashi.

Amnesty International densema human rights telok temi longkak aitaka Djamani nem tasüba temerenshi agütsü. Singapore nung temesepba mozü amshir nem tasüba temerenshi agütsüba ya international law nung aibelener aser iba temerenshi yagi temesepba mozü amshiba nung tenokdangba kangabo magütsür, ta human rights telok temi ashir.

(Maneni tapak 8 nung...)

Medemer Fund ajanga Futsal Tournament ayongzüka lir



Dimapur, Chiteni/July 28 (TYO): Medemer Fund ya tajemzükba jenjang nung aliba tanurtem makamait ajanga education monguteti alirtem yaritsü asoshi inyaker.

Tanur shia nem education agütsütsü ya maongka lir, aser Medemer Fund ajanga tanurtem takum nung temelenshi bener arutsütsü aser parnok tsürabortem nem senotsü teyari agüja

education atema sen agütsütsü, library amenoktsü, pei sasa aayanga poksünga alitsü asoshi training agütsütsü asoshi inyaker.

Parnoki mental health tebilemetsü asoshia teyari nungdabapur nem counseling session tem angati agütsür.

Item inyakyim yaritsü atema senotsü bendena Medemer Fund ajanga ananü - July 28-29, 2023 - "The

Henosis Cup" nungja agütsür futsal tournament ka Niathu Sports Complex, Kohima nung ayongzüka lir.

Iba asayamung ya Rajesh Soundararajan, IAS, Secretary to Governor ajanga tenzüktsü. Iba asayamung tenzükba sentong nung Theja Meru, Chairman TaFMA aser Dr. Hovithal Sothu, Project Director TaFMA nungertema dena liasü.

Asian Games: India tebur team China, Bangladesh & Myanmar den ata lir

New Delhi, Chiteni/July 28 (Agencies): Hangzhou Asian Games nung football asaya atema draw Brehostibarnü süogo aser India tebur team Group A nung China, Bangladesh, aser Myanmar den ata lir.

Kasaji India tetsür team-a Group B nung Thailand aser Chinese Taipei den ata lir.

Sports Ministry-i tang benoka aliba criteria atsüshitsü atema telemtetba agiba sülen India tebur aser tetsü team iba asayamung nung shilem agitsüba jangja liasü.

Tebur tetoktepba nung telok trok küma lemsar lir aser telok ajak nungi temaba jenjang nung tembangba team ana aser tasembuba jenjang nung tembangba team tajungtiba pezü round of 16-i aitsü.

Tetsür tetoktepba nung telok ajak nungi temaba jenjang nung

tembangba team ka aser tanabuba jenjang nung tembangba team tajungtiba asem quarterfinals-i aitsü.

India tebur team-i Asia Games nung taoba mapanga junga asayaogo. India team-i 1951 aser 1962 nung iba asayamung nung gold medal ngua liasü.

Indian Olympic Association (IOA)-i India tetsür aser tebur team iba asayamung nung asayadaksütsü asoshi memulungi liasü kechiyong parnok Asia nung top-8 nung mali.

Iba sülen All India Football Federation (AIFF)-i Sports Ministry dang team anaprongla iba asayamung nung shilem agidaksütsü mepeshi aser senior national team head coach Igor Stimac-ia Ato Kiloner Modi dangi temepeshiba ka yoka liasü.

Nagaland nung Energy Access Explorer... (Tapak 1 nungi...)

Iba atema Nagaland-i rongsenketzüng renloktsü, sustainable development aser infrastructure atema sentong atongtsüla. Chief Minister Neiphiu Rio lenisüba kübok state sorkar aser IDAN ajanga iba sentong atongtsü atema special expert committee ka tentetogo" ta paisa metetdaksü.

Iba committee yagi Prime Minister indang economic advisory bank den külemi inyaksangshitsü aser Nagaland indang road map yakta sayatsü. Expert committee-i ashiba onüktem yagi tarutsü nung Nagaland melenshitsu imlar, ta

paisha. Iba sentong nung Nagaland Development Commissioner, R. R a m a k r i s h n a n - i a unconventional & renewable energy ajungkettsü aser temulung agütsütsü indang jembu.

"IDAN-i SDG-9 den liromedema mopung aser solar energy amshia clear & clean energy sources bener arutsü meranger" ta pai ashi.

Commissioner & Secretary of Industries & Commerce Department, Kekhrievor Kevichusa-ia Nagaland nung industries renloktsü atema

energy nungdakba indang jembu aser Joint Director New & Renewable Energy, Inaho P. Awomi-i energy planning indang onükjembu.

Maneni, Director (Dental), Health & Family Welfare, Dr Chiekroshuyi Tetseo-ia health care services indang jembu.

India nung Jharkhand, Assam aser Nagaland dak alia Africa nunga linük 6 nung Energy Access Explorer (EAE) mapa tenzükogoo.

Iba sentong nung Nagaland GIS & Remote Sensing Centre, Project Director, Mhathung Kithan-i anküp tepela o jembu.

Women's World Cup: China asoshi mezüngbuba takok nguogo

Sydney, Chiteni/July 28 (Agencies): 2023 Women's World Cup indang Group D nung Hokulbar aonung Haiti madak takok anguba ya China asoshi takok mezüngbuba alitsü.

China-i iba asaya nung akokba ajanga Hokulbarnüa Denmark madak 1-0 agi koka aliba England ya last 16 asoshi ano qualify mesüteter.

Asaya tenzükter minute 29 buba nung China midfielder Shang Rui-i Haiti tsür Sherly Jeudy dak temoko alema tur atsükba yong la asayadak nungi yok.

Ajisüaka minute 74 buba nung Ruthny Mathurin-i Zhang Linyan dak aibelena Wang Shuang-i penalty metsüa yokba goal ya kisüng liasü.

China yagi alima nung jenjang 53 buba nung aliba Haiti den draw mesüra tamakok ajuru asübo England ya asaya ka anünga liaka knockout stages tongtetla.

Group D nung asaya tetembang ya Mongulbarnü asayatsü, aser iba mapang points trok bener England ya China den asayatsü aser kasa mapang Denmark ya Haiti den asayatsü.

China aser Denmark ya points asem-sem bena lir, aser World Cup nung mezüng asayaba Haiti ya points

tazüngla nung lir, saka parnoki Denmark madak takok ngua China-i England ya mokokra, parnok last 16 atema qualify asütsü.

Ibai Haiti asoshi maongka magitetba asaya ka liasü.

Minute 90 asayaba nung Haiti nungi Melchie Dumornay-i metsüba Zhu Yu-i nokdangba ya dang lar teloki target nung metsübaji liasü.

Second half temer mapang apulokja asaya tenzükter minute tanabuba nung Wu Chengshu-i Roseline Eloissaint dak jangja-jangja tai mena amai ajiteta Marta Huerta de Aza-i Haiti nem penalty metsütsü agütsü.

Ajisüaka video assistant referee nungi repringba sülen Huerta De Aza temolung melenshia penalty ya magütsü.

Ano iba sülena Li Mengwen-i Dumornay nokdangba ajanga Haiti nunger asayartemi penalty meshia liasü, saka referee-i magütsü.

1999 World Cup runners-up China ya mezüng asaya nung Denmark-i 1-0 agi akok saka August 1 nü England akoktsü teimla lir.

Iba anogo China aser Denmark nati kokra, tena den England densema points trok-rok bener alitsü aser goal difference ajanga team ana knockout stage-i aitsü.

Heroin gram 31 mechi... (Tapak 7 nungi...)

"Alima ajunga aser talisa ozüng mesüra inyakyim nung tasüba temerenshi agiener aliba linüktem dang Singapore nung iba temerenshi tamajung, meimchir yimya masü aser tashi mait inyakyim anendaksütsü merangba nung yaritsü ayongzüker," ta Amnesty International ajanga hopta tetenzüklen sangdong ka nung shia liasü.

Iba temerenshi agütsütsü lia yangji aliba advocacy group, Transformative Justice Collective ajanga ketdangsurtem-i nisung azü jemmüba aija liasü.

Singapore nung temesepba mozü amshiba nung aibelener nem temerenshi agütsüba ya kanga taoksatsüka lir, ta United Nations nungi takotet telok kati April ita shia liasü aser police temi asüngdangyaba mapang oshi meyiptsür magütsü Tamil nung arishi küm 46 tain ka alenseta südaktsüba sülen tekeraba nung iba ozüng melenshitsu ayongzüka liasü.

Singapore sorkari nüburttem longkak aitba aser media kanga sashia azüoka lir

aser parnoki tasüba temerenshi ya temesepba mozü shibelenba nungi nokdangtsü asoshi lir aser nübür timbai iba ozüng bukumer ta shia liasü.

COVID-19 pandemic mapang khen anena ataba sülen Singapore nung March 2022 nungi tenzükta tang tashinung bendanger densema temesepba mozü dak sendakba aibelen nung nisung 15 alenseta südaktsüogo.

Heroin gram 50 shi shibelenba mechi Bodhbarnü arishi küm 57 tain Mohd Aziz bin Hussain alenseta südaktsü.

Iba city-state nung temesepba mozü shibelenba mechi tetsür nem tesüsa tasüba temerenshi agütsüba ya 2004 küm arishi küm 36 tain hairdresser Yen May Woen liasü.

Singapore ya business tsütsü tesep ka ama alimai meteta lir, ajisüaka China aser North Korea densema temesepba mozü shibelenba nung aibelener nem tasüba temerenshi agütsüba linük ishika rongnung Singapore ya dena lir.

BILEMDANGANG

"Nükjidong ka ayutsü asoshi na kodanga menua mali."